

06 JAN 1999

Tambak

JOHOR KENALPASTI TANAH UNTUK PEMBINAAN JAMBATAN BARU

JOHOR BAHRU, 6 Jan (Bernama) -- Kerajaan negeri Johor telah mengenalpasti kawasan seluas antara 280 hektar dan 320 hektar di Tanjung Puteri di sini untuk ditebus guna bagi pembinaan jambatan baru menggantikan Tambak Johor.

Menteri Besar Datuk Abdul Ghani Othman berkata kerajaan pusat telah mengenalpasti sebuah konsortium tempatan untuk membina jambatan baru itu yang terletak bersebelahan Kompleks Kastam Tanjung Puteri.

"Kita harap pembinaan jambatan itu dapat dilaksanakan pada tahun ini," katanya kepada pemberita di sini hari ini.

Beliau berkata konsortium itu akan mengemukakan reka bentuk serta butiran mengenai jambatan baru sepanjang 1.5km itu pada satu taklimat khas 14 Jan ini.

Abdul Ghani berkata jambatan baru itu akan membolehkan bot dan kapal bergerak dengan bebas sementara laluan air tidak akan tersekat seperti yang berlaku di Tambak Johor.

"Saya percaya dengan adanya jambatan baru ini dan pembangunan di sekitarnya, Bandaraya Johor Baharu akan berubah wajah dengan menjadi sebuah bandaraya yang lebih indah," katanya.

Mengikut perancangan, Tambak Johor yang berusia 76 tahun itu akan dirobohkan selepas siapnya jambatan baru yang dicadangkan itu.

Menurut laporan media pada bulan lepas, kerajaan Malaysia pada prinsipnya telah memberikan kelulusan kepada konsortium Gerbang Perdana Sdn Bhd untuk melaksanakan projek itu.

Detik Nagasari Sdn Bhd milik Transwater Corp Bhd memegang 20 peratus kepentingan dalam konsortium itu. Dua anggota lain konsortium itu ialah Diversified Resources Bhd yang memegang 20 peratus kepentingan dan Merong Mahawangsa Sdn Bhd, milik IBEX Corp Amalgamated Sdn Bhd, yang memegang 60 peratus kepentingan.

Cadangan untuk menggantikan Tambak Johor dengan sebuah jambatan telah diutarakan oleh Perdana Menteri Datuk Seri Dr Mahathir Mohamed ketika mengadakan lawatan rasmi ke negeri ini pada Julai 1996.

Tambak Johor sepanjang 1.2km yang dibina pada tahun 1923, merupakan antara dua laluan, selain Laluan Kedua di Tanjung Kupang, yang menghubungkan Malaysia-Singapura.

-- BERNAMA

RAM AKD